

de Daulphiné que de Viureis, s'estans logés près de Vienne, pensans d'y entrer par le moien du chasteau de Pipet, que tenoit a la deuotion dudit Sr de Maugiron, ce que n'ayant peu executter il amena toutes lesdites troupes assieger cette ville qui fut baptuë par quatre gros canons qu'ilz auient amené de Vallance. Ilz abatirent vne tour apellée de la Valette qu'estoit au coing de la ville, du cousté venant du port, firent vne grande bresche, donnarent assault général et entrarent dans ladite ville qu'ilz pilliarent entierement, rompirent tous les meubles et emportarent tout ce qu'ilz peurent charrier, avec l'ayde des peisans d'Ampuis et de Daulphiné, qui pilliet comme les soldatz.

Les habitans hommes et femmes se retirarent dans le chasteau et vieulx fort apellé le Hault de Ville, avec le Sr de Villars quy commandoit, et enuiron soixante soldatz estrangers que Monsieur de Cheurieres auoit emuoïé de Vienne. Lesdits ennemis ayant demeuré deux jours entiers dans ladite ville et faulxbourgs et faict quelque contenance de dresser leur batterie contre ledit chasteau et Hault de ville, se retirarent, craignant le renfort qui estoit arriué dans Vienne, venu de Grenoble et lieulx circonuoisins conduictz par les seigneurs dudict pays de Daulphiné qui teniont le parti des catholicques vnis, passarent lesdits canons delà le Rhosne, de peur de les perdre, lesditz habitans retirés audit fort du Hault de Ville, jecterent le feu par dessus les murailles et firent brusler toutes les maisons qui estiont autour desdites murailles et plusieurs autres. Que fust vne grande ruïne et perte aux particuliers à quy elles appartenent.